

*Fundacion Herencia Cultural Inmaterial***Nominando herencia riba e Inventario Nacional di Aruba**

ORANJESTAD -- Ayera mainta miembronan di directiva y coordinador di Fundacion Herencia Cultural Inmaterial a haci un bishita di cortesia na Minister di Cultura, Sr. Otmar Oduber. Motibo pa esaki ta pa introduci e fundacion y papia riba e meta di e fundacion y informa minister tocante e desaroyo di e trabou. Fundacion Herencia Cultural Inmaterial ta traha riba implementacion di e tratado di UNESCO pa salvaguardia Herencia Cultural Inmaterial den nomber

di gobierno. Den practica esey ta resulta entre otro den guia grupo y personanan pa traha un plan pa salvaguardia nan tradicion, custumber of expresion cultural. Minister di cultura, Sr. Oduber a duna di conoce di ta sostene e trabou di e fundacion.

Plan pa futuro

Pa splica e meta di e fundacion y stimula gruponan den comunidad pa traha un plan pa futuro e fundacion ta organisa encuentronan informativo y ta duna presentacion. Gruponan interesa

por haya guia pa traha riba un plan pa salvaguardia nan tradicion. E oficina ta na Biblioteca Nacional Aruba. Minister di Cultura a confirma cu e ta para tras di e fundacion y cu e ta tuma pasonan concreto pa sostene e trabou di e fundacion.

Forma di biba

Herencia Cultural Inmaterial ta biba den forma di tradicion, custumber y ritual, fiesta y celebracion, storia y sabiduria, arte y artesanía tur caminda na Aruba. Grandi of chikito, carga pa hopi hende of un grupo chikito, internacionalmente conoci of casi lubida, tur tin balor y merece atencion y mester cuida nan.

Inventario Nacional

Ta tarea di Fundacion Herencia Cultural Inmaterial pa bay en busca di cada elemento y pone esaki riba mapa. Ta pidi gruponan pa nomina nan herencia riba e Inventario Nacional di Aruba. E Inven-

tario Nacional ta un medio pa crea un clima caminda herencia cultural inmaterial por biba, desaroya, florece y haya su balor. E ta un reconocimiento pa e inversion y pasion cu cada actor ta hinca aden y un prome paso pa e lista representativo di Herencia Cultural Inmaterial di UNESCO.

Ta e intencion pa mas tanto posibel miembronan di e comunidad Arubano nomina un tradicion.

No solamente personanan cu ta practica pero tambe personanan cu ta mira (kisas cu dolor den nan curason) cu un tradicion ta bayendo perdi por yuda.

Pa mas informacion encuanto e Inventario Nacional y e procedura di traha riba un plan pa salvaguardia por tuma contacto cu e coordinador Sra. Gina Jie Sam Foek na Biblioteca Nacional Aruba, tel. 582-1580. □

